



ILLUSTRISSIMO
LUXEMBURGENSIUM, MONTIS-MAURENTIACI
ET PIGNEII DUCI,
PARI, PRIMOQUE CHRISTIANO
GALLIARUM BARONI,
REGIS ORDINUM EQUITI,
EXERCITUUM EJUS LEGATO GENERALI,
PRÆTORIÆ COHORTIS PRÆFECTO,
NEC-NON NORMANNIÆ
GUBERNATORI, &c.

Vovet, offert & consecrat obsequentissimus N. L. BERTHE
Chirurg. studiosus.

THESES ANATOMICÆ ET CHIRURGI CÆ



ALCULI corpora sunt dura & faxea in quâdam corporis humani parte ex humoribus concreta Illos in omnibus corporis partibus, nullibi verò frequentius quàm in vesicâ urinariâ (sive in renibus, sive in ipsâmet vesicâ nati sunt,) reperiri, frequens demonstrat experientia. Ubicunquè autem

fuerint efformatæ; concretiones faxeas à majore partium terrestrium; salinarum, glutinosarumque copiâ, vel à partis *λιώτης* vitio pendere ideo conjicitur, quod qui crudioribus vescuntur alimentis, quique fibras juxta laxiores aut constrictiores habent, hoc morbo sæpius afficiantur.

MULTIPLEX Calculorum in vesicâ species; eorum autem differentiæ à mole, soliditate numeroque sunt desumendæ; maxima pars eorum in vesicâ fluitat, ejus cervici supponuntur nonnulli, quidam tandem peculiaribus veluti casulis includuntur, & incarcerati ideo à lithotomis appellantur. Calculorum incarceratorum existentia dubiè inexplorata, nunc tot exemplis comprobata est, ut in controversiam vocari non possit (a).

HÆC sunt Calculi in vesicâ delitescents signa: frequens sed inane meiendi desiderium; continuus in pene pruritus; limpida, turbulenta, cruentæ, mucoso viscosoque humore, nec-non albo sedimento refertæ urinæ, cum intensis doloribus, eâ evacuatâ intensioribus, stillatitia excretio; involuntariæ virilium erectiones; tenescmus; pondus ad pubem, dum stat æger majus; ac tandem indice & medio sinistrae manûs in ægri anum introductis, durities intra vesicam percipitur: ex his calculum in vesicâ nidulari, conjicere, non affirmare licet: certius autem cathetere in vesicam immisso & in corpus durum impingente, si præsertim collisionis tempore quidam percipiatur sonus, calculi existentia comprobatur.

COMPERTO Calculo, ad symptomatum quæ parit, (ægro sicut mos est præparato) curationem, statim deveniendum: hæc autem vel remediis Calculum in vesicâ dissolvere valentibus, vel ejus extractione obtinenda. Lithontripticorum actionem (b) inutilem & noxiam comprobavit usus; ad solam ergo operationem confugiendum: ut vero Chirurgus temerè illam non aggrediatur, 1^o. vulnerandas partes, 2^o. varias methodos quibus Calculus extrahi potest, 3^o. tandem rationum momenta quibus hanc vel illam anteponat, apprimè callere debet; hæc tria seorsim à nobis sunt exponenda.

§

VESICA sacculus est musculofo-membranaceus in imâ & anteriore hypogastrica regionis parte, ossa pubis abdominalesque musculos inter & peritonæum rectumque positus, lotium à renibus secretum per

(a) Conferantur ea quæ super hanc rem scripsit M. Houstet in Reg Chirurg. Acad. Commentariis, pag. 395. & sequentib.

(b) Hoc Heisterus in primâ latinâ Institut. suarum Chirurg. Editione, pag. 894. Douglassius in suâ novâ Lithotom. instituendi ratione gallicè conversâ, pag. 16 & sequentibus. Piètreus in Quæst. suâ Medico-Chirurg. An. ad extrahendum Calculum dissecanda ad pubem vesica? Aliique benè multi annotaverunt.

tempus asservans, illudque suâ contractione excernens. Figuram quodammodo ovatam vesica refert, & dividitur, 1°. In facies, quarum una anterior est, altera posterior; 2°. In partes laterales; 3°. verò in partem superiorem *fundum* dictam, mediam, & inferiorem seu *cervicem*. Mediam fundi partem ligamentum quoddam inæqualis crassitie; umbilico annectit; cervicis pars anterior in urethram desinit & posterior duobus in locis plus minus-ve à se invicem distantibus, ureterum extremis obliquè perforatur.

PLURES membranæ vesicam component, exterior nempè, media & interior: exterior communis & cellularis est: mediam muscularem dictam, plurima constituunt strata, quorum externa vesicæ longitudinem excurrunt, & interna plus minus-ve obliqua sunt: musculares fibræ cervicem versus aggestæ & quibusdam fasciculis à pube procedentibus (a) densatæ, vesicæ sphincterem constituunt: interna tandem villosa dicitur: in hujus textu non pauci nervi plurimæque conspiciuntur glandulæ (b), mucum quemdam quo vesicæ interiora illiniuntur, continuè eructantes. Arteriæ ab hypogastricis internis, venæ iisdem ex venis nascendæ, nervique ab ultimis sympathici majoris propagininibus sacrisque oriundi, membranas illas perreptant.

URETHRA canalis est membranoso-spongiosus in litteræ S formam in viris inflexus, ab anteriore cervicis vesicæ parte usque ad penis extremitatem protensus. Urethra duabus constat membranis, quarum exterior à textu cellulari vix differt; has inter, glandulæ modò describendæ textusque spongiosus reperiuntur: si glandulas exceptis, duæ illæ membranæ non nisi cellulari quâdam substantiâ in primâ urethræ parte à se separantur, indè illa, pars urethræ membranacea appellatur; accedit substantia quædam cellulis quàm pluribus referta, hinc spongiosa dicta, inæqualisque in suis partibus crassitie, quâ enim parte incipit, nec-non versùs penis extremitatem crassior est, atque hinc bulbum urethræ, indè vero penis glandem efformat.

INFERIOREM cervicis vesicæ, primamque urethræ partem ambit corpus quoddam glandulosum, Castaneæ nucis, aut juxta alios cordis figuram referens, *prostatæ* dictum; in mediâ faciei anterioris parte, sulcus quidam longitudinalis considerandus venit, prostaticarum corpus duas velut in partes dividens, & in quo urethra continetur. Spongiosus quidam textus, plurimique folliculi in internâ prostaticarum substantiâ observantur, ex quibus totidem enascuntur ductus, circa verumontanum aperiundi.

(a) Videatur C. Winslowii expositio Anat. pag. 732.

(b) Videatur C. Winslowius in opere citato, pag. 557. Palsin in Anat. sua Chirurg. Tom. prim. pag. 159. Falconetus in Quæst. An educendo Calculo, cæcis anteponendus apparatus lateralis ?

MEMBRANACEAM urethræ partem, alia quoque cingit glandula à Littrio (a) primùm descripta. Urethram in modum zonæ pollicis latæ omni ex parte ambit, plurimaque vasa excretoria in urethram hiantia habet. Recensita præter ostia, alia quoque in urethrâ conspiciuntur, talia sunt 1°. Urethræ lacunæ, decem circiter numero; 2°. vasorum excretoriorum ab antiprostatitis oriundorum, 3°. que ductuum ejaculatorum extremitates; hæc à verumontani lateribus extant; verumontanum autem caruncula quædam est, in eâ urethræ parte quam ambiunt prostatæ, inferiùs conspiciunda.

MUSCULI plures ad descriptas partes pertinent, iique in eos qui prostatitis & eos qui urethræ inserviunt, meritò distinguuntur. Prostatorum duo superiores, duo verò inferiores sunt: superiores à posteriore ossium pubis parte, inferiores verò ab utrâque ossium pubis & ischii commissurâ ad prostatas extenduntur; eorum qui ad urethram pertinent, alii qui bulbo-cavernosi dicuntur, urethræ bulbo, spongiosæ ejus substantiæ, corporibus nerveis & transversalibus musculis adhærent; alii *transversales*, *triangulares* ve dicti, externæ tuberositatis ischii, inferiorique urethræ parti, utrinque connectuntur.

§

CALCULI è vesicâ urinariâ extractionem Lithotomiam, improprio licet vocabulo appellant: hæc autem duplex, superior nempe & inferior. Superior ea est quæ super pubis ossâ, inferior verò quæ in perinæo celebratur. Superior hypogastrica Franconianave ab authoris sui nomine, dicitur: inferior autem quæ multiplici ratione perfici potest, eandem ob rationem Celsica, Mariana, Raviana, Cheseldenianave appellatur, prout juxta hujus illiusve methodum instituitur (b).

SECTIO hypogastrica hoc modo celebretur: æger supinus in lecto sic decumbat, ut pulvinaribus coxendicis ossibus pectori capitiqve subjectis, nates pectus & caput, mediâ abdominis parte, elatiore

(a) In Regiæ scient. Acad. Commentariis, anno 1700.

(b) Præter methodos Lithomiam inferiùs instituendi à Celso, aliisque suprâ memoratis vel inventas vel descriptas, aliæ quoque sunt quibus Calculi extractio perfici potest, & de quibus ob instituti nostri rationem, invitissimè superfedemus; tales sunt ex quas CC. Foubert, Ledran, Lecat, aliique præstantissimi, ejusdemque notæ Chirurgi, in medium nuper protulerunt, & quarum descriptiones legi possunt in Heisteri & Platneri Inst. Chirurgicis; Reg. Chirug. Acad. Commentariis; Garangeoti Draniique operationibus Chirurg. Cheseldenii append. anglicè conscripto: in Filgi dissert. de variis Lithotomiam administrandi viis & Ravianæ præstantiâ; Kesselingii Hist. & examine method. Foubert. administrandi Lithotomiam; in Gunzii Obs. Chirur. de Calculum curandi viis, C. Falconetti Theâ modò citatâ,

sint; ministris hōc in situ detineatur; fistula in vesicam demittatur; cuius ope liquor quidam in eam possit injici; educto siphone, operator incisionem in mediā abdominis parte quatuor digitos supra pubis ossa incipiat, & eam usque ad penis radicem extendat; cute, textuque cellulari, primo hoc ictu scapelli sectis, lineam albam; eādem fere ratione, incidat, (a) detectāque vesicā scalpelli aciem perpendiculariter in eam sic demittat (b), ut dorsum pectori, acies verò pubi obvertatur; index sinistræ manūs scalpellum veluti sequatur, & in vesicam immittatur, ut eo incurvato vesicæ parietes quasi suspensi retineantur, usque sub ossibus pubis incidatur vesica, eductoque tandem scalpello, Calculus vel digitis vel forcipibus, extrahatur (c).

CUM Celsus instituendus est apparatus, æger tabulæ pulvinari-
bus lineisque duplicatis instructæ, & in quā sedile fuit inversum sic imponitur, ut coxæ illius super mensæ marginem collocentur sitque semi-supinus, crura à se invicem deducuntur, flectuntur genua, brachiaque laqueo injecto, genubus malleolisve alligantur; hoc in situ tribus præterea continetur ministris, quorum duo utrumque genu & pedem continent, alter verò illius humeris incumbit, & postquam quartus minister scrotum sustulit, indicem & medium sinistræ manūs oleo prius illitos, Chirurgus in anum quā profundius fieri potest intromittit, dextrāque imam abdominis partem comprimens, Calculum versus perinæum adducere nititur, illum eo in loco, incurvatis digitis retinet; scalpellum dextrā apprehendens cutem textum cellularē & ipsammet vesicam obliquē (d) suprā tumorem incidit, tandemque cum jam calculus in conspectum venit, eum digitis solis, foras propellit, vel unco aut forcipibus, extrahit. His peractis digito

(a) Non debet incidi vesica quin liquor ope fistulæ in hujus cavitate semper remanentis, rursus injiciatur, cum non satis turgida apparet, illud primi suascie Midleton & Maggill.

(b) Illud suadent CC. Cheselden & Morand in suo tractatu de Lithotomiā superiore.

(c) Nullus non videt operationem illam eodem modo in omnibus omnino circumstantiis celebrari non posse; si enim fistula in vesicam immitti non posset, tunc injectionis loco, ægro præciperetur ut quā majorem urinæ quantitatem retineret, sicque vesica naturaliter distenderetur. Illud primus commendavit Rossiter in tract. suo de partu Cæsareo; si verò Calculus major, tentatā prius sectione quālibet in perinæo, hāc ultimā ratione veniret extrahendus, tunc partes supra Calculum ipsum, ad modum Franci forent incidendæ.

(d) Loco sectionis obliquæ Celsus lib. 70. cap. 26. vult cutim juxta anum lunatā plagā incidi, cornibus ad coxas spectantibus paululum, dein de eā parte quā struitor ima plaga est, etiam nūm sub cute, alteram transversam plagam institui quā vesicæ cervix aperiat.

vesicæ interiora Chirurgus explorat, ut si quidam fortè Calculus sabula-ve in eâ remanserint, vel immisissis supra specillum globulo instructum forcipibus, vel cochleari digiti ope introducto, possint educi, hæmorrhagiamque, si superveniat, ellychniis styptico medicamine imbutis, ligaturâve coërcet.

ÆGER in Marianâ eodem præcise modo ac in Celsicâ sectione & collocatur & detinetur; deinde verò catheterem sulcatum Chirurgus in vesicam per urethram dimittit; scroto ritè elevato tensisque perinæi integumentis, catheterem sic dirigit, ut dextrum cum ægri corpore angulum faciat, parsque illius gibbosa extus promineat; & cum sinistrâ obfirmans, dextræ indice sulcum ejus investigat, lithotomo cutem, textum cellularem, bulbo cavernosum sinistri lateris musculum, spongiosamque urethræ partem, uno veluti ictu, ab inferiore scroti parte usque ad unius pollicis ab ano distantiam, incidit; deindè catheteris manubrium extollendo, concavam illius partem fornicis ossium pubis applicat; lithotomum in catheteris sulco hærentem profundius adigit, illum rursus ad superiorem incisionis suæ partem reducit, & eodem in situ continendum præbet; lithotomi ope, canaliculati ductoris lingulam, (a) in sulcum catheteris immittit, lithotomum eximi jubet, canaliculatum ductorem in vesicam adigit, catheterem educit, canaliculati ductoris manubrium sinistrâ apprehendit, dextræ indicem (b) in illius sulcum lente & pedetentim intrudit, forcipes ejusdem sulci ope in vesicam introducit, manus invertit & canaliculatum ductorem educit: forcipum tandem ansas lentè à se diducit, iis rursus approximatis calculum inquiri, apprehendit, motibusque alternis extrahit.

RAW, celeberrimus olim in Universitate Leydensi Anatomes & Chirurgiæ Professor, suam secandi methodum sic celebrabat: primò, ægrum in mensâ quâdam demissiore, pulvinari dorso supposito, supinum ita collocabat, ut coxæ illius mensæ margini responderent, & eum modo suprâ dicto alligabat; deindè cathetere longiore rostro, sulcoque profundiore instructo (c) in vesicam demisso, illius manubrium versus inguen dextrum & abdomen inclinabat, ut nempe secandis partibus catheteris applicaretur curvatura: postea cutem, cellularemque textum satis profundè ab eo loco, in quem Mariana de-

(a) Canaliculati ductoris loco, instrumentis quibusdam ensiformibus, conductis, foribusque dictis, veteres utebantur.

(b) Hæc dilatatio quæ nunc fit modo suprâ descripto, dilatatoribus quibusdam, quorum figuræ in *Alghisi tractato di Lithotomia* conspici possunt, olim instituebatur.

(c) Ravium vesicæ corpus non incidisse, vel alio cathetere usum fuisse, credi Dranius; vid. *le parallele*, pag. 116. & seq.

finit incisio ad ischii tuber obliquè incidebat, tum educto lithotomo, catheteris curvaturam explorabat, & juxta illam incisionem extendebat: ægro tandem firmius detento, catheterisque curvaturâ tertiâ vice exploratâ, lithotomi apicem in illius fulcum demittebat, corpusque vesicæ incidebat. Quod reliquum est, juxta scalpellum conductores, & illos inter, forcipes in vesicam compellebat.

In operatione Cheseldenianâ æger eodem præcisè modo ac in præcedenti collocatur & retinetur, deinde catheter, benè incurvus profundèque sulcatus in vesicam immittitur & illius manubrium chirurgus quodam à sinistro ægri latere posito continendum traditur; sic autem disponi debet, ut manubrio versus inguen dextrum inclinato, illius convexitas obliquè inter erectorem & acceleratorem sinistri lateris promineat: scrotum idem minister elevat, & lithotomo haud replicatili cutis & textus cellularis profundè, ab eo loco in quem sectio Mariana desinit, usque ad sinistri ischii tuber, inciduntur: tùm sinistra manus indice catheteris sulcus investigatur, si fortè dimotus fuit, suo in loco reponitur, ac ejusdem digiti ope, lithotomi mucro per inferiorem vulneris angulum obliquè in catheteris sulcum adigitur. Cætera uti in Marianâ sectione perficiuntur (a).

QUÆCUNQUE autem ex illis methodis extractus fuerit calculus, embrocationes ex oleo rosaceo instituendæ sunt, & plaga, consuetor vulnorum simplicium aut contusorum more, pro re natâ, deliganda & ad cicatricem perducenda.

§

RATIONUM momenta quibus ad hanc vel illam ex suprâ descriptis methodis anteponendam, Chirurgus impelli potest, 1°. ab ægri habitu; 2°. à vesicæ ipsius statu; 3°. à Calculi specie; 4°. à loco quem Calculus occupat; 5°. tandem à minori accidentium operationem quamlibet subsequantium quantitate sunt desumenda. Relativè ad ægri habitum; junioribus minor vel altus convenit apparatus; in senibus verò vel obesioribus neuter debet celebrari. Respectu habitus ad vesicæ statum; cum parva est & sana, quælibet ex sectionibus quæ infra pubis ossa fiunt, indifferenter institui potest: eam è contrâ parva est & morbo quodam affecta sola Mariana methodus celebranda est. Quoad Calculi speciem: Calculus amplus, admodum oblongus, racemosusve altus, facile vero frangendus eundem necnon Ravianum exposcit apparatus; asper Celsicam, Marianamque sectionem respuit. Si ratio habeatur ad locum quem Calculus occupat, qui cervici impactus hæret, in perinæove tumorem ef-

(a) Hoc tamen cum discrimine, ut ductoris canaliculati manubrium dextrorsum inclinatam esse debeat.

format, Celsicâ, quique incarceratus est, operatione Chefeldenianâ; venit extrahendus. Si tandem spectetur ad accidentium operationem quamlibet subsequendum quantitatem; omnibus anteposenda venit vel Franconiana vel Rayiana sectio.

Has Theses DEO JUVANTE, & præside M. RAPHAËLE BENEVENTO SABATIER, Liberalium Artium & Chirurgiæ Magistro, tueri conabitur NICOLAUS-LUDOVICUS BERTHE, Ambianensis, in alimâ Universitate Parisiensi Artium Magister.

P A R I S I I S :

IN REGIIS CHIRURGORUM SCHOLIS:

Die 28^a Septembris, anno Salutis 1753. à sesqui-secundâ post meridiem ad septimam.

PRO ACTU PUBLICO,

E T

MAGISTERII LAUREA:

Typis DELAGUETTE Regiæ Chirurg. Academiæ
Typographi, 1753.